

Nunalerinermut, imminut pilersornermut, inuussutissanut, nutaaliornermullu aamma imminut akilersinnaanermut aallaaveqartumik ilinniarfimmik pilersitsisoqarnissaa siunertaralugu INULI suleqatigalugu Naalakkersuisut peqquneqarnissaannik Inatsisartut aalajangiiffigisassaattut siunnersuut. Pilersitsinissap killiffia kingusinnerpaamik UPA2026-imi saqqummiunneqassaaq.
(Inatsisartunut ilaasortamit Mariane Paviassen Jensen, Inuit Ataqatigiit, saqqummiunneqartoq)

pillugu

Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliap

siunnersuutip aappassaaneerneqarneranut

ISUMALIUTISSIISUTAA

Ataatsimiititaliap suliarinninnermini ilaasortarai:

Inatsisartunut ilaasortaq Nivi Heilmann Efraimsen, Inuit Ataqatigiit, siulittaasoq
Inatsisartunut ilaasortaq Isak Johannessen, Naleraq, siulittaasup tullia
Inatsisartunut ilaasortaq Margrethe Thårup Andersen, Demokratiit
Inatsisartunut ilaasortaq Hans Erik Enoksen, Demokratiit
Inatsisartunut ilaasortaq Anders Olsen, Siumut

UKA2025-mi ulloq 15. oktober siullermeerinninnerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Nunalerinermut, imminut pilersornermut, inuussutissanut, nutaaliornermut piujuartitsinissamillu aallaaveqartumik ilinniarfimmik Naalakkersuisut Narsami inuussutissalerinermik ilinniarfik suleqatigalugu pilersitsissasut siunnersuuteqartumit kissaatigineqarpoq. Ilinniarfik taamaattoq nerisassaqarniarnikkut imminut pilersornerulersinnaanermut aqqutissiuussisuusaaq. Taamatuttaaq siunnersuutigineqarpoq ilinniakkap aallartinnissaanut killiffik kingusinnerpaamik UPA2026-mi saqqummiunneqassasoq.

Siunnersuutip Inatsisartuni siullermeerneqarnera

Siunnersuut Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliamut innersuunneqartoq siullermeerinninnermi tapersorsorluarneqarpoq. Minnerunngitsumik imminut pilersorsinnaanerulernissaq aammalu INUILI-mi periarfissat atorluarneqarnissaannik eqqarsaatit tapersorsorneqarput. Tamatumalu peqatigisaanik Kalaallit Nunaata kujataani avannaanilu imminut pilersornermi pissutsit pinngortitalu assigiinngissusiat oqallisigineqarput.

Siunnersuutip aningaasatigut kingunerisassai

Inatsisartut suleriaasianni § 33, imm. 1, allaqqavoq siunnersuut tunngavilersugaassasoq siunnersuutillu aningaasatigut allaffissornikkullu kingunerisinnaasai allaaserineqarsimassasut.

Siunnersuutip aningaasatigut kingunerisassai pillugit paasissutissat siunnersuuteqartumit Naalakkersuisunilluunniit saqqummiunneqanngillat.

Ataatsimiititaliap siunnersuummut oqaaseqaatai

Inatsisartut aalajangiiffigisassaattut siunnersuummik siullermeerinninnermi suliniutigineqartoq tapersorsorluarneqartoq aammalu ilaatigut tassunga atatillugu imminut pilersornerup annertunerulernissaanik suliffeqarnerullu inuussutissalerinerup iluani piujuartitsinermik aallaaveqarnissaanik kissaateqarneq oqaluuserineqartoq ataatsimiititaliamit siullertut pingaarnertullu maluginiarneqarpoq. Upernaviarsummi unammilligassat annertuut oqallinnermi tikinneqarmata tassunga ilanngullugu oqaatigineqassaaq.

Siunnersuut akuerineqassasoq inassutigineqartoq tamatumunngalu tunngavilersuutit Naalakkersuisunit saqqummiunneqartut ataatsimiititaliamit maluginiarneqarpoq, tassungalu ilanngullugu taaneqarluni ilinniakkat iluarsaateqqinnissaat nutarterneqarnissaallu siunertaralugu suleqatigiissitamik pilersitsinissamut periarfissaq. Ilutigisaanik Naalakkersuisut allassimavaat siunnersuummut matumunnga atatillugu ilinniarfik nutaaq unammillernartunut, silap pissutaata allanngoriartorerata imminullu pilersornerulernissamut pisariaqartitat nassatarisaannut, aaqqiissutissanik nutaanik pilersitsisinnaasoq, taamaalillunilu nuna tamakkerlugu inuussutissanik tunisassiorneq inuiaqatigiittullu ineriartornerup iluani piujuartitsinerunermut suliniut iluaqutaassalluni.

Savaatilinnngorniarfimmi unammillernartut annertuut immikkullu ittut pillugit Naalakkersuisut nalunaarutit eqqartorneqartut atorlugit nassuiaateqarnerat ataatsimiititaliamit naammagisimaarneqarpoq, tassungalu atatillugu suliffissaqarnikkut pisariaqartitat eqqummaariffigineqalersimasut. Ilutigisaanik Upernaviarsummi illuutit tuniniarneqarnissaat, savaatilinnngorniarfiup Narsamut nuunneqavinnissaa, kiisalu ilinniarfiit pioreersut nutarterneqarnissaat, taamaalillutik inuiaqatigiit kissaataannut pisariaqartitaannullu naapertuunnerulernissaat, Naalakkersuisut pilersaarutigigaat ataatsimiititaliamit

maluginiarneqarpoq.

Ataatsimiititaliap pitsaasutut nalilerpaa ilinniakkatigut aaqqiissutissanik nassaarniarluni sulianik, imminut pilersornerup annertunerulernissaanik suliffeqarnerullu inuussutissalerinerup iluani piujuartitsinermik ineriartortitsinermik kinguneqartussanik, aallartitsisoqarnissaa Naalakkersuisut siunnersuummik matuminnga akuersisoqarnissaanut innersuussissuteqarnertik aqputigalugu kissaatigaat. Siunnersuut tapersernartuusoq ataatsimiititaliamit nalilernerqarpoq, imminut pilersornerup annertunerulernissaanik suliffeqarnerullu inuussutissalerinerup iluani piujuartitsinermik ilinniarfiup pineqartup pilersinneqarnera aqputigalugu piviusunngortinneqartussanngormat. Siunnersuut piviusunngortinneqarpat aningaasatigut kingunerisassai pillugit siunnersuuteqartoq aamma Naalakkersuisut paasissutissanik saqqummiussaqaanngitsut ataatsimiititaliamit maluginiarneqarpoq, taamaattumillu naatsorsuutigineqarluni paasissutissat taakkua Naalakkersuisut UPA2026 nalaani killiffimmik saqqummiussilerpata ilanngunneqassasut.

Siunnersuummi matumani pineqartumi ilutigisaanik ataatsimiititaliamit maluginiarneqarpoq sulisussat amigaataanerat aamma ilinniakkanik nalimmassaasarnert pillugit ilisimasassat suliffeqarnermi pisariaqartinneqartunut qulakkeerinnittussatut naammannersut, taamaalilluni suliniut siunissami ataavartuullunilu piujuartitsisuuniassamat. Nuna tamakkerlugu sulisussanik amigaateqarneq kiisalu nuna tamakkerlugu suliffissat pisariaqartitaannut naapertuuttunik ullutsinni siunissamilu piginnaasanik ineriartortitsisinnaanissaq eqqarsaatigalugu suliffeqarnermi ilinniarfissanik tigussaasunik pisariaqartinneqartut pillugit kiisalu nunatta avammut soqutigisai pillugit erseqqissumik paasinninnermik peqartariaqartoq ataatsimiititaliamit nalilernerqarpoq. Taamatuttaaq ilinniarfiit sorliit salliutinneqassanersut ilinniarfiillu sorliit suliffeqarfinni pisariaqartinneqartunut naapertuukkunnaarsimanersut pillugit erseqqissaasoqartariarpoq.

Ataatsimiititaliap inassuteqaatai

- Ataatsimiititaliami amerlanerussuteqartut Demokraatit, Inuit Ataqatigiit aamma Siumup ilaasortaataitaasa siunnersuutip akuerineqarnissaa inassutigaat.

Taamatuttaaq ilinniarfinnut pikkorissarnissamullu neqeroorutininik suliffeqarfinni pisariaqartinneqartunik misissuititsinermik Naalakkersuisut suliaqaqqullugit ataatsimiititaliap isumaqatigiittup kaammattuutigaa. Ukkatarineqartariaqartussat tassaassapput inuussutissarsiornermut ilinniakkat ingerlaqqiffiusumillu ilinniakkat iluanni inatsisilerinermut, aningaasaqarnermut, nunanut tamalaanut, ingerlatsinermut assassormermullu piginnaasanut tunngassutillit. Siunertarineqartoq tassaavoq nunatta namminiilivinnissaanut, piujuartitsinermut imminullu pilersornermut piginnaasaasa nukittorsarnissaat. Misissuineq ilisimatusarnikkut suleqatigiissitamiit piginnaasaqarlualartumit suliarineqartariaqarpoq.

Taamatut oqaaseqaateqarluni isumaliutissiissummilu allassimasutut paasinnilluni
ataatsimiititaliap siunnersuut aappassaaniigassanngortippaa.

Nivi Heilmann Efraimsen
Siulittaasoq

Isak Johannessen
Siulittaasup tullia

Margrethe Thårup Andersen

Hans Erik Enoksen

Anders Olsen